



Broj: 01/5-50-1-6-7/07
Sarajevo, 4.9.2007.godine

Z A P I S N I K
8. sjednice Komisije za saobraćaj i komunikacije,
održane 24.9. 2007. godine

Sjednica je održana 24.9.2007., s početkom u 11,10 sati.

Sjednici su prisustvovali članovi Komisije:

- | | |
|----------------------------------|---------------------|
| 1. Branko Dokić, predsjedavajući | 7. Snježana Rajilić |
| 2. Slavko Matić | 8. Husein Nanić |
| 3. Sadik Sado Bahtić | |
| 4. Selim Bešliagić | |
| 5. Mehmed Suljkanović | |
| 6. Savo Erić | |

Opravdano je odsustvovao Šemsudin Mehmedović.

Iz Vijeća ministara BiH sjednici su prisustvovali: Veselin Poljašević, zamjenik ministra komunikacija i prometa BiH, i Miroslav Bjelobrk, viši stručni saradnik u Ministarstvu.

Sjednici je prisustvovao i sekretar Komisije za saobraćaj i komunikacije Ahmed Jalovičić.

Predsjedavajući Branko Dokić predložio je sljedeći

D N E V N I R E D

1. Usvajanje Zapisnika 7. sjednice Komisije,
2. Prijedlog zakona o elektronskom pravnom i poslovnom prometu – predlagač: Vijeće ministara BiH (druga faza),
3. Razmatranje Izvještaja o radu i poslovanju Javnog radiotelevizijskog servisa Bosne i Hercegovine za 2006.godinu, s Izvještajem o radu Upravnog odbora,
4. Tekuća pitanja.

Ad. 1.

Na Prijedlog zapisnika nije bilo primjedbi, pa je Komisija jednoglasno usvojila Zapisnik 7. sjednice.

Ad. 2.

Predsjedavajući je ukazao da nema uložених amandmana na Prijedlog zakona o elektronskom pravnom i poslovnom prometu, te dao riječ predlagaču Zakona.

Veselin Poljašević istakao je da u ranije dostavljenom obavještenju Ministarstva za tačku d) treba iza člana 20. dodati stav (1). Smatra da je Prijedlog zakona dobar, da je zakon istog sadržaja i obima već usvojen u razvijenim evropskim zemljama, te da ga je potrebno usvojiti.

Kako nije bilo prijavljenih za raspravu, Komisija je primila k znanju i prihvatila ispravku tehničke greške u članu 31. stav (1) Prijedloga zakona i to:

- u tački a) umjesto “član 5.” treba da stoji “član 15.”;
- u tački b) umjesto “član 6.” treba da stoji “član 16.”;
- u tački c) umjesto “član 9.” treba da stoji “član 19.” (na dva mjesta);
- u tački d) umjesto “član10.” treba da stoji “član 20. stav (1)”;
- u tački e) umjesto “član 11.” treba da stoji “član 21”.

Komisija je jednoglasno prihvatila tekst Prijedloga zakona o elektronskom pravnom i poslovnom prometu, te predlaže Predstavničkom domu Parlamentarne skupštine BiH njegovo usvajanje.

U smislu odredbi člana 113. Poslovnika Predstavničkog doma Parlamentarne skupštine BiH, za izvjestioca u plenarnoj fazi imenovan je predsjedavajući Komisije Branko Dokić.

Ad. 3.

Predsjedavajući je podsjetio da je predsjedavajući Upravnog odbora Javnog RTV servisa uputio dopis Kolegiju Predstavničkog doma i Komisiji u kojem traži da se odgodi razmatranje Izvještaja o radu i poslovanju Javnog radiotelevizijskog servisa Bosne i Hercegovine za 2006.godinu, sa Izvještajem o radu Upravnog odbora. Kao razlog odgađanja navedeno je da su stručne službe Radiotelevizije uputile primjedbe na nacrt revizorskog izvještaja, pa je potrebno da Ured za reviziju institucija dostavi konačan Izvještaj o izvršenoj reviziji poslovanja RTVBiH za 2006.godinu, te predlaže da se razmatranje ove tačke dnevnog reda odgodi za sljedeću sjednicu Komisije. Ukazao je na činjenicu da je Plamenku Čustoviću istekao mandat u Upravnom odboru i da je Regulatorna agencija za komunikacije tek sada raspisala konkurs, a bila je dužna to učiniti prije četiri mjeseca. Iako Upravni odbor može formalno raditi i s tri člana, smatra da bi Komisija trebalo da da preporuku da Plamenko Čustović nastavi raditi u Upravnom odboru sve do imenovanja novog člana iz bošnjačkog naroda.

Selim Bešliagić podržao je ovaj prijedlog, jer smatra da je u ovom trenutku jedino moguće rješenje da Plamenko Čustović ostane član Upravnog odbora do izbora novog člana.

Razmatrajući ovu tačku dnevnog reda, Komisija je jednoglasno usvojila sljedeće zaključke:

1. Komisija predlaže Kolegiju Predstavničkog doma da se s dnevnog reda 15. sjednice skine tačka Izvještaj o radu i poslovanju Javnog radiotelevizijskog servisa BiH za 2006.godinu, sa Izvještajem o radu Upravnog odbora.
2. S ciljem održavanja kontinuiteta u radu Upravnog odbora Javnog RTV servisa, potrebno je da Plamenko Čustović nastavi raditi u Upravnom odboru sve do imenovanja novog člana iz bošnjačkog naroda.

Ad. 4.

Predsjedavajući je upoznao prisutne da je imao sastanak s predstavnicima vozača instruktora vožnje i autoškola iz Federacije BiH na kojem su oni ukazali na nedorečenosti u Zakonu o sigurnosti saobraćaja na putevima u BiH, pa im je sugerirao da dostave Komisiji konkretne prijedloge, kao i da bi bilo korisno da to bude stav predstavnika autoškola i instruktora s cijele teritorije Bosne i Hercegovine. Njihov zahtjev je da im se omogući prijelazni period od četiri godine u kojem bi oni koji imaju određeno radno iskustvo mogli osposobljavati kandidate za polaganje vozačkog ispita iz oblasti propisa o sigurnosti saobraćaja. Mišljenja je da Ministarstvo u ovom slučaju nije imalo dovoljno širine, jer se htjelo dati na značaju saobraćajnom fakultetu, te da bi se prijedlog za prijelazni period mogao podržati.

Slavko Matić istakao je da je Parlament Federacije BiH za državne službenike koji su ranije postavljeni s višom spremom dao mogućnost da ostanu na istim mjestima i to u periodu od tri godine, kako bi mogli steći visoku spremu. Smatra da se i u ovom slučaju može dati rok za prijelazni period.

Mehmed Suljkanović mišljenja je da je potrebno, pošto svi članovi Komisije podržavaju ove izmjene, naći način da se procedura efikasno provede, a da predlagač izmjena bude Komisija.

Snježana Rajilić ukazala je na činjenicu da nije organizirana asocijacija autoškola, da se obuka obavlja u neadekvatnim prostorijama, a da, za razliku od Hrvatske, kod nas autoškole nemaju javna ovlaštenja. Ako bi bio podržan prijedlog za ostavljanje mogućnosti prijelaznog perioda, on bi morao ići po hitnoj proceduri.

Husein Nanić smatra da država mora uspostaviti kontrolu nada radom autoškola, jer tu očigledno ima dosta problema, pa čak i korupcije.

Savo Erić mišljenja je da treba sagledati i analizirati probleme u radu autoškola, te podržava prijedlog da se licima s radnim iskustvom omogući rad u prijelaznom periodu.

Nakon rasprave, Komisija je usvojila sljedeći zaključak:

Zadužuju se predsjedavajući i sekretar Komisije da organiziraju sastanak s predstavnicima udruženja vozača instruktora vožnje i autoškola i predstavnicima Ministarstva komunikacija i prometa BiH o temi: Izmjene Zakona o osnovama sigurnosti saobraćaja na putevima u BiH, kojim bi se utvrdio prijelazni period u kojem bi bilo dozvoljeno vozačima instruktorima vožnje koji nemaju visoku spremu saobraćajnog smjera osposobljavanje kandidata za polaganje vozačkog ispita iz oblasti propisa o sigurnosti saobraćaja.

Predsjedavajući je upoznao prisutne sa sadržajem poziva Udruženja konsultanata inženjera BiH za "1. BH kongres o cestama", koji će biti održan u Sarajevu 27. i 28. septembra 2007. godine.

Na prijedlog Huseina Nanića, usvojen je sljedeći zaključak:

Traži se od Ministarstva komunikacija i prometa BiH da dostavi Komisiji Izvještaj o dosadašnjim aktivnostima na projektu „Autoput na Koridoru Vc“, kao i informaciju o aktivnostima u vezi sa izgradnjom drugih autoputeva u Bosni i Hercegovini.

Budući da nije bilo više pitanja, predsjedavajući je zaključio sjednicu u 11,55 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić